

# TOMKE®

**Jierferslach 2012**

Jiergong 16

Tema natuer



# Ynhâldsopjefte

<b>Foaropwurd</b>	<b>3</b>
<b>1. Algemiene ynformaasje oer de doelstelling en organisaasje fan it Tomke-projekt</b>	<b>4</b>
Wa is Tomke? Wat is it Tomke-projekt?	4
Materialen foar pjutten en opfieders	4
Ynformaasje foar professionals	4
Organisaasje fan it Tomke-projekt	5
Finansiering	5
<hr/>	
<b>2. Ferslach oer de aktiviteiten sa't dy konkreet yn 2012 plakfûn hawwe</b>	<b>6</b>
Tema natuer	6
Aktiviteiten foar en mei pjutten	6
Ynformaasjefoarsjenning en materialen foar professionals	8
Materialen foar pjutten en opfieders	9
<hr/>	
<b>3. Finansjele ferantwurdning</b>	<b>10</b>
<hr/>	
<b>4. Leden fan de Tomke-wurkgroep 2012</b>	<b>11</b>
<hr/>	
<b>Taheakke</b> Oersjoch fan de partisipearjende organisaasjes	<b>12</b>

# Foaropwurd

Omtinken foar taal- en lêsbefoerering – benammen yn in twatalige provinsje lykas Fryslân – is nedich foar it ûntwikkeljen fan in stimulearjend lêsklimaat. It Tomke-projekt leveret hjir in wichtige bydrage oan.

It Tomke-projekt is yn 1996 opset en Tomke is yntusken in ‘bekende Fries’ wurden, in hiele generaasje is mei Tomke grut wurden. It draachflak foar Tomke en dêrmei foar de Fryske taal is grut.

Tomke hat ek yn 2012 wer ferskate avontoeren belibbe. Sûnder de grutte ynset fan ferskate organisaasjes, hie dat net mooglik west. De bydrage van subsydzjefjouwers (hast alle gemeenten yn Fryslân en de provinsje Fryslân) is ek fan kruciaal belang foar it súksesfol útfieren fan it Tomke-projekt.

De Tomke-wurkgroep betanket alle sybsydzjefjouwers hertlik foar harren bydrage en elkenien dy’t op hokker wize dan ek bydroegen hat oan wer in súksesfol ferrûn Tomke-jier.

Wy binne bliid om jo hjirby it ynhâldlik ferslach en de finansjele ferantwurdig oan te bieden.

De koördinatoaren fan it Tomke-projekt,

Carolien Hoekstra (Afûk)

Gertrud Palstra (BSF)



# 1. It Tomke-projekt

## ***Wa is Tomke? Wat is it Tomke-projekt?***

It Fryske Tomke foarlês- en taalstimulearringsprojekt, it Tomke-projekt, hat dizze namme om't alle materialen en aktiviteiten basearre binne op ferhalen oer de pjut Tomke. Tomke is in jonkje fan trije jier dat allegearre aventoeren belibbet mei syn hûntsje Romke, Kornelia de Kangaroo (mei har boekebûdel) en it buorfamke YanaYu. Se prate allegearre Frysk.

It Tomke-projekt rjochtet him op bern van 2 o/m 4 jier en harren opfieders. It projekt wol âlden en liedsters fan pjutten ynformearje oer it brûken fan taal yn 'e omgong mei jonge bern. Foarlêze, ferskes sjonge, (taal)spultsjes en oandacht foar de deistige saken binne wichtich foar it lizzen fan in goede taalbasis. Dat jildt foar alle talen, dus ek foar it Frysk: bern dy't harren memmetaal goed behearskje, kinne makliker in oare taal leare. Ut ferskate wittenskiplike ûndersiken docht bliken dat lêsbefoarding in goede taalûntjouwing ta gefolch hat. In goede taalûntjouwing en meartaligens hawwe in geunstige ynfloed op de kognitive en sosjaal-emosjonele ûntwikkeling. Goede taalfeardigens hat ek in positive ynfloed op it súkses op skoalle.

It Tomke-projekt hat as doel de Frysktalige lêskultuer dy't bern yn de foar- en ierskoalske leeftyd omjout, te befoarderjen om úteinlik de taalûntwikkeling en it lêsgedrach fan de bern te stimulearjen, likegoed yn it Frysk as yn it Nederlânsk.

## ***Materialen foar pjutten en opfieders***

In wichtige opdracht foar it Tomke-projekt is it ûntwikkeljen en oanbieden fan Frysktalich materiaal dat yn in meartalige foarskoalske omjouwing brûkt wurde kin. Oer it generaal hawwe pjutteboartersplakken en bernedeiferbliuwen net in soad middels foar materiaal en (by)skoalling as it giet om it kreëarjen fan in Fryske taalomjouwing. It Tomke-projekt foarjocht dêryn. Troch it (foar)lêzen yn de Fryske taal en it brûken fan eigentiidske materialen, wurdt in ferantwurde basis lein foar de taalûntwikkeling fan pjutten. Dat jildt net allinnich foar Frysktalige bern, ek by net Frysktalige bern hat bliken dien dat dizze oanpak goed wurket om op in noflikke wize yn 'e kunde te kommen mei de Fryske taal. It materiaal noaget út om fuort te brûken. Dat befoarderet de akseptaasje by it grutte publyk en it brûken dêrfan as middel foar taalûntwikkeling yn in meartalige omjouwing. De ferskate uterings (lykas it Tomke-boekje, de TV aventoeren en de Tomke-website) binne ynhâldlik op inoar ôfstimd. Dat befoarderet werkenning en makket de akseptaasje sterker.

## ***Ynformaasje foar professionals***

Foar liedsters, meiwurkers en oare professionals dy't harren dwaande hâlde mei it jonge bern binne der it jierlikse Tomke-symposium, de Tomke-nijsbrieven en de Tomke-website [www.tomke.nl](http://www.tomke.nl). It symposium is ornearre foar it oerdragen fan kennis. De Tomke-

nijsbrief befettet ynformaasje oer aktiviteiten en nije materialen. Boppedat is ek de Tomke-webside in wichtige ynformaasjeboarne.

### ***Organisaasje fan it Tomke-projekt***

It Tomke-projekt wurdt struktureel yn 'e gaten holden en trochûntwikkele troch in gearwurkingsferbân fan ferskate organisaasjes, dy't der tiid, minsken en enerzjy ynstekke. It projekt stiet ûnder tafersjoch fan it PLF (Platfoarm Lêsbefoarderding Fryslân).

De algemiene projektkoordinaasje is in mienskiplike ferantwurdlikheid fan de Afûk en de Bibliotheekservice Fryslân. Dêrby koordinearret de Afûk de ûntwikkeling en produksje fan de materialen, ûnderhâldt de kontakten mei de ferskate doelgroepen en fertsjintwurdigers fan de ynstellings, fersoarget de korrespondinsje en de notulen, hâldt de fuortgong yn de gaten en ynspirearret de minsken fan de wurkgroep. De Bibliotheekservice Fryslân hat in algemiene koordinearjende taak, fersoarget de subsydzje-oanfragen, it jierferslach en de finansjele ferantwurdling. Boppedat nimt BSF it inisjatyf foar it program foar de biblioteken. Foar de útfiering fan it projekt is in wurkgroep aktyf. Dizze wurkgroep komt 8 kear yn it jier byinoar en draacht yn grutte mate by ta in goede ôfstiming en kontinuïteit fan de ferskate aktiviteiten. De Tomke-wurkgroep bestiet út fertsjintwurdigers fan de partisipearjende organisaasjes. Troch de

kontinuïteit yn de útfiering, wurdt it Tomke-projekt op hannen droegen – troch pjutten, âlden, pakes en beppes en liedsters fan de pjutteboartersplakken en bernedeiferbliuwen. Binnen it projekt wurde regelmjittich nije materialen ûntwikkele en beskiber steld foar pjutteboartersplakken, bernedeiferbliuwen, biblioteken en thús. Trochdat it oanbod foarsjocht yn in ferlet, wurde de oplages alle jierren grutter.

Taheakke 1 jout in oersjoch fan de partisipearjende organisaasjes en de leden fan de wurkgroep.

### ***Finansiering***

Yn 2012 ûntfong it Tomke-projekt subsydzje fan de Provinsje Fryslân en hast alle gemeenten yn Fryslân, te witten;

Achtkarspelen, It Bildt, Boarnsterhim, Dantumadiel, Dongeradiel, Ferwerderadiel, Gaasterlân-Sleat, It Hearrenfean, Kollumerlân, Ljouwert, Ljouwerteradiel, Lemsterlân, Littenseradiel, Menameradiel, Opsterlân, Skarsterlân, Súdwest-Fryslân en Tytsjerksteradiel.

By de oanfragen foar subsydzje by gemeenten is de hichte fan it oanfrege bedrach basearre op it tal ynweners fan de oanbelangjende gemeente.

Boppedat waard ek troch de Afûk, BSF, Omrop Fryslân en Partoer in finansjele bydrage levere. Yn haadstik 3 fine jo it it finansjele ferslach en ferantwurdling oer 2012.

## 2. Ferslach fan it jier 2012

### **Tema natuer**

It tema foar 2012 wie ‘natuer’. Dat betsjut dat ‘natuer’ as kapstok brûkt is foar de ferhalen yn de Tomke-boekjes en alle oare aktiviteiten.

Krekt as yn foargeande jierren binne der binnen it Tomke-projekt trije ynfalshoeken te ûnderskieden, dat binne aktiviteiten foar en mei pjutten, aktiviteiten foar en mei opfieders (âlders en professionals) en it ûnwikkeljen fan materiaal foar in meartalige omjouwing yn de foarskoalske perioade.

### **Aktiviteiten foar en mei pjutten**

- Fryske foarlêswike
- Tomke yn de biblioteken; mei Tomke op de foto
- Tomke op de televyzje
- Foarstelling ‘Help ... in oaljefant’
- ‘Tomke-wrâld’
- ‘Tomke-app

### *Fryske foarlêswike*

Begin juny is het foarlêsbokje ‘Tomke, de natuer yn...’ ferskynd. Dat boekje waard fergees útdield en foarlêzen tidens de Fryske Foarlêswiken. Yn de perioade fan 4 juny o/m 8 juny 2012 waard op 382 (2011-318) lokaasjes foar berneopfang of pjutteboartersplakken foarlêzen. De measte lokaasjes hawwe mear as ien groep. It foarlêzen barde yn 23 gemeenten, ferspraat

oer 250 pjutteboartersplakken (2011-236), 132 bernefeiferbliuwen (2011-82) en 90 gastâlders (2011-26). Meiinoar is der oan 675 groepen pjutten foarlêzen. Yn in protte gemeenten wie it resultaat 100% dat wol sizze dat alle boartersplakken en feiferbliuwen meidien hawwe.

It Selskip foar Fryske Tael en Skriftekennisse organisearre it foarlêzen en it útdielen fan de Tomke-boekjes. (Yn de Stellingwerven waard de Stellingwerfse ferzje fan it Tomke-boekje brûkt). Om it foarlêzen mooglik te meitsjen, wienen der mar leafst 500 entûsjaste foarlêzers aktyf. In team fan 52 kontaktpersoanen keppele per gemeente de foarlêzers oan de ferskate lokaasjes.

### *Tomke yn de biblioteken*

Fan it begjin fan it Tomke-projekt ôf binne de Fryske biblioteken behelle by it Tomke-projekt. Tusken it geweldich grutte Nederlânsktalige aanbod fan de lanlike programma’s hat Tomke yn de biblioteken syn eigen plakje fûn.

By ferskate aktiviteiten foar de foarskoalske perioade waarden Tomke-materialen brûkt en/of útdield.

Tidens it Fertel & Foarlêst Festival yn de earste twa wike fan juny organisearren 27 biblioteken de aktiviteit ‘Mei Tomke op de Foto’. Dêrfoar waarden libbensgrutte Tomke-kostúms mei in heech

'aaiberensgehalte' ynset. Sawol troch de bern as harren âlders waard dizze aktiviteit tige wurdearre. Der waard ek foarlêzen en de bern krigen it Tomke-boekje mei nei hûs.

Yn de Kinderboekenweek yn oktober koenen de pjutten mei harren âlders of pakes en beppes yn de biblioteek it boekje 'In liuw yn 'e tún' ophelje. Der waarden mar leafst 3.500 útdielboekjes fergees ferspraat. Tidens dizze aksje waarden âlders ynformearre oer de mooglikheid bern o/m 16 jier fergees lid te meitsjen fan de biblioteek.

#### *Tomke op de televyzje*

Foar de televyzje waarden 18 nije Tomke-ferhaaltsjes skreaun doch Riemkje Pitstra en Auck Peanstra. Luuk Klazenga fersoarge de yllustraasjes en de stimmen waarden ynsprutsen troch Tamara Schoppert en Douwe de Bildt. Feije van der Meer van Omrop Fryslân fersoarge de opnames en hie de einredaksje yn hannen. De nije Tomke-ôfleverings waarden útstjoerd yn en om de Fryske Foarlêswike hinne en yn de rest fan it jier wienen werhellings te sjen. Alle wykeinen is der by Omrop Fryslân 'Tomke-tiid' te sjen, in programma foar pjutten mei Tomke yn de haadrol.

#### *Foarstelling 'Help... in oaljefant'*

De fertelfoarstelling mei Tomke yn de haadrol slút oan by it tema natuer. Yn in foarstelling fan likernôch 30 minuten ûntdekte Tomke en syn hûntsje Romke fan alles oer bisten yn e natuer. De foarstelling kin spile wurde yn boarterslokalen fan bernedeiferbliuwen, pjutteboartersplakken, biblioteken ensfh. De belangstelling foar de foarstelling is grut.

#### *Tomke-wrâld*

'Tomke-wrâld' (Tomke-wereld) is in ynteraktive site foar pjutten, ûnderbrocht by de webside oer Tomke. Yn de Tomke-wrâld is fan alles te finen foar pjutten. It skerm is sa ynrjochte dat lytse bern (fan twa jier ôf) hiel maklik mei de mûs oer it skerm navigearje kinne. It is in kleurich gehiel, mei gelûd, printeboeken mei beweejende bylden, kleurplaten, puzzels, foarlêserhaaltsje, lietsjes, taalspultsjes en nifelwurkjes om te downloaden. De tema's fan Tomke-wrâld waarden yn trochsneed om 'e seis wiken oanpast. Wa't dat wol kin in berjocht efterlitte yn it gasteboek.

#### *Tomke-app*

Geskikt foar de Ipad is de Tomke-app. Dizze is fergees te downloaden yn de Appstore fan Apple. De app is bedoeld foar pjutten en bestiet út trije Tomke-boekjes op rym. De bylden bewege en it ferhaal wurdt foarlêzen. Nei elts ferhaal kin it bern in spultsje dwaan.

## ***Ynformaasje foarsjenning en materialen foar professionals***

- Tomke nijsbrief
- Tomke-symposium
- Website [www.tomke.nl](http://www.tomke.nl)
- Tomke en de sânglêsrige

### *Tomke-nijsbrief*

In nijsbrief foar professionals ferskynde yn 2012 trije kear. De nijsbrief waard yn in oplage fan 750 stiks ferstjoerd nei alle pjutteboartersplakken en bernsintra en de jeugdkonsulinten fan de biblioteken. De nijsbrief ynformearre harren oer aktiviteiten, nije materialen en oare saken oangeande Tomke en foarskoalske ûnderwerpen.

### *Tomke-symposium*

It Tomke-symposium is spesjaal ornearre foar liedsters fan bernsintra en oare professionals. It programma bea in kombinaasje fan (by)skoalling, útwikselje fan ûnderfinings, besjen en beoardielje fan materialen en it opdwaan fan nije ynspiraasje en ynsjoggen. Krekt as de oare aktiviteiten stie ek it symposium fan 2012 yn it teken fan natuer.

De organisaasje fan it symposium wie yn hannen fan Stichting Partoer CMO Fryslân en fûn plak yn de Buitenplaats “De Alde Feanen” yn Earnewâld.

It programma bestie út de folgjende ûnderdielen:

- Iepening mei in kompilaasje fan de Tomke foarstelling ‘Help ... in oaljefant’.
- Ynliding; bern en frij boartsje yn de natuer.
- 6 workshops; boartersplein yn it grien; de natuer fan bûten nei binnen; hoe giet it by kids en animals; útdaagjende bûtenaventoeren; alles begjint mei klanken; sintugetocht mei pjutten, set alle sinnen op skerpe.
- Ynformaasjemark.

It symposium waard troch goed 50 professionals besocht.

### *Website [www.tomke.nl](http://www.tomke.nl)*

Tomke hat in eigen website dy't yn 2012 trochsneed 1500 kear yn 'e moanne besocht waard. De website bestiet út twa ôsûnderlike parten. Ien part is bedoeld foar pjutten en befettet de al earder neamde ynteraktive site ‘Tomke-wrâld’. It oare part is bedoeld foar âlders, opfieders, professionals en ynteressearren en jout in soad ynformaasje oer it projekt en de beskibere materialen. Dêrnêst hat de site nijs, aktiviteiten, nuttige links en in argyf mei PDF's fan Tomke-nijsbrieven.

### *Tomke en de sânglêsrige*

De Tomke-wurkgroep naam yn 2003 it inisjatyf om te kommen ta de útjefte fan Frysktalige temabrosjueres.

Dêrút ûnstie de Sân-glêsrige as totaalprogramma foar pjutteboartersplakken, mei omtinken foar taalûntwikkeling, motoryk en oare ûntwikkelingsgebieten.

Der binnen no 13 temabrosjueres (foar bern fan 2-5 jier) beskiber mei oantreklik ferwurkingsmateriaal, in hantlieding en in dvd. De tema's komme ek werom op de Tomke-website.



## ***Materialen foar pjutten en opfieders***

- Tomke-boekje ‘Tomke, de natuer yn...’
- Tomke-boekje ‘In liuw yn de tún’
- Tomke-dvd
- Tomke-poster
- Tomke-fertelkoffer
- Heit en Mem

### *Tomke-boekje ‘Tomke, de natuer yn...’*

Tidens de Fryske Foarlêswiken is it Tomke-temaboekje útdield. It foarlêsbokje ferskynde yn in Frysktalige en Stellingwerfse ferzje mei fjouwer ferhaaltsjes, twa ferhaaltsjes mear as yn de foargeande jierren. Boppedat hie it foarlêsbokje wer in protte yllustraasje, opsiferskes, lietsjes en in kleurplaat. Der wie ek ynformaasje yn opnommen oer it Tomke-projekt, Fryske printeboeken en oare media. It 28 siden tellende boekje waard foarmjûn yn de karakteristike Tomke-styl troch Monique Vogelsang. Krekt as foarhinne soargen de skriuwsters Auck Peanstra en Riemkje Pitstra foar de ferhaaltsjes. Lietsjes en ferskes wienen fan Geartsje Douma en de yllustraasje waarden fersoarge troch Luuk Klazenga en Linda de Haan.

It Tomke-boekje ferskynde begjin juny en waard fergees distribuearre fia it netwurk fan de biblioteken en konsultaasjeburo’s. It grutste part waard útdield troch de foarlêzers tidens de foarlêswike. De oplage wie foar de Fryske ferzje 30.000 eksimplaren en 1000 yn it Stellingwerfs.

### *Tomke-boekje ‘In liuw yn de tún’*

Tidens de berneboekewike yn oktober 2012 waarden troch de biblioteken 3500 eksimplaren fan it boekje ‘in liuw yn ‘e tún’ fergees útdield oan de jongste biblioteekbesikers. It boekje bestie út in ferhaal, in opsiferske en in spultsje. Diskear wie Riemkje Pitstra de skriuwster, Luuk Klazenga fersoarge de yllustraasjes.

### *DVD*

Der is in DVD produsearre yn in oplage fan 100 stiks. De DVD bestiet út 8 útstjoerings fan de 18 nije TV aventoerkes fan Tomke.

### *Tomke-poster*

De Tomke-poster mei dêrop de yllustraasje fan de foarkant fan it Tomke-boekje, makke wer diel út fan it oanbod. Dit jier waarden de posters ek wer ophongen yn biblioteken, pjutteboartersplakken, berneopfang, wachtkeamers, konsultaasjeburo’s, gemeentehuzen en buerthuzen.

### *Fertelkoffer*

Yn 2009 hawwe de pjutteboartersplakken en bernedeiferbliuwen in Tomke-fertelkoffer mei allerhanne Tomke-materialen krigen. Lykas yn de foargeande jierren kaam der yn 2012 wer in oanfolling foar de koffer. Dat wienen de folgjende materialen:

- Tomke-DVD mei 8 aventoerkes
- in hantlieding mei suggestsjes by it tema ‘natuer’, kleurplaten en wurkblêden

### *Heit en Mem*

Heit en Mem is in twatalich (Frysk en Nederlânsk) tydskrift foar jongen âlders. Yn 2012 brocht de Afûk trije nûmers fan Heit & Mem út, dy’t û.o. fia iepenbiere gebouwen, lykas biblioteken, oer de provinsje ferspraat waarden. It blêd jout ek omtinken oan nije materialen en eftergrûnynformaasje oer it Tomke-projekt, dêrtroch kinne beide programma’s inoar fersterkje.

### 3. Tomke finansjeel ferslach 2012

	wurklik	begrutte	wurklik
	2011	2011	2010
<b>LESTEN</b>			
<b>Materiaal</b>			
Tomke-boekjes, Frysk, Bildts & Stellingwerfs	15.619	14.000	14.379
Oare tomke-materialen	4.276	4.000	3.311
<b>Eveneminten</b>			
televyzje útstjoerings	*	12.360	33.024
Symposium	*	3.500	5.716
<b>Distribúsje</b>			
Kosten fan fersprieding	226	1.500	130
Jierferslach	505	1.500	873
<b>Organisaasje</b>			
Burokosten / projektkoördinaasje AFUK	*	3.000	16.078
Ekstra oeren AFUK	*	5.590	
Burokosten / projektkoördinaasje BSF	*	2.640	11.875
Finansjele begelieding	1.500	1.500	1.500
Unfersjoen	305		109
<b>TOTAAL LESTEN</b>	<b>122.144</b>	<b>44.000</b>	<b>86.995</b>
<b>BATEN</b>			
<b>Subsydzjes</b>			
Subsydzje Provinsje	24.500	24.500	24.500
Subsydzje Gemeenten	27.446	19.500	26.368
	<b>51.946</b>	<b>44.000</b>	<b>50.868</b>
<b>Materiaal</b>			
Ferkeap Tomke- materialen	3.212		2.301
<b>Eveneminten</b>			
Entree dielnimmers symposium	875		1.505
<b>Organisaasje</b>			
Eigen bydrage dielnimmers	66.111		32.321
<b>TOTAAL BATEN</b>	<b>122.144</b>	<b>44.000</b>	<b>86.995</b>

#### *Algemeine opmerkings*

De begrutting fan 2012 is basearre op de ferwachte subsydzje ynkomsten. It oersjoch op dizze side wurdt publisearre yn it 'iepenbiere' Tomke-jierferslach.

#### *Ferklearring fan de wichtichste ferskillen tusken 2011 en 2012*

Yn it ramt fan finansjele transparânsje oer Tomke is der yn 2012 foar keazen om de wurklike personele kosten fan de ferskate aktiviteiten yn it oersjoch op te nimmen. Dat betsjut dat in tal posten dúdlik heger binne as earder presintearre / begrutte waard. It foardiel fan dizze opstelling is dat dêrtroch in dúdliker byld ûntstiet oer de hichte fan de eigen ynbring fan de dielnimmers oan Tomke.

## 4. Leden fan de Tomke-wurkgroep 2012

- Carolien Hoekstra / Afûk, koördinaasje
- Gertrud Palstra / Bibliotheekservice Fryslân, koördinaasje
- Lineke Kuipers / Afûk
- Riemkje Pitstra / ûnderwiiskundige
- Anja Riem / fertsjintwurdiger âlders
- Mirjam van der Hoek / SFBO
- Mieke Vos / Cedin
- Partoer CMO Fryslân
- Feije van der Meer / Omrop Fryslân



# **Taheakke** Partisipearjende organisaasjes

## **Platfoarm Lêsbefoarding Fryslân (PLF)**

It PLF is in oerkoepeljend orgaan yn de provinsje Fryslân, mei as doelstelling it stimulearjen fan ûnderlinge gearwurking. De kearnzaak fan it PLF is it koördinearjen fan projekten foar taal- en lêsbefoarding.

It PLF wol him ynsette foar in meartalich lêsklimaat yn de hiele provinsje en fungearret dêrby as oansprekpunt foar subsydzjeferlieners, polityk en beliedsmakkers. De lanlike Stichting Lezen – in wichtich pleitbesoarger foar de twadde rykstaal – nimt ek diel yn dit oerlisorgaan. Fan it PLF út wurde subsydzjeoanfragen yntsjinne en de fuortgong fan it Tomke-projekt yn 'e gaten holden. Bibliotheekservice Fryslân fersoarget it sekretariaat fan it PLF.



## **Afûk - [www.afuk.nl](http://www.afuk.nl)**

De Afûk hat as missy De Fryske Taal en Kultuer ticht by de minsken te bringen. Dêrfoar set de Afûk ferskillende middels yn, sa as: it oanbieden fan kursussen Frysk, it ûntwikkeljen en beskikber stellen fan Frysktalich materiaal en it (meiwurkjen oan it) organisearjen fan aktiviteiten wêrtroch de foardielen fan meartaligens yn it algemien en de kulturele wearde fan de Fryske taal yn it bysûnder ûnder de oandacht brocht wurde.


Binnen it Tomke-projekt soarget de Afûk benammen foar it ûntwikkeljen en produsearjen fan materialen en it ûnderhâlden fan kontakten mei de doelgroepen en organisaasjes. Dizze wurkwize soarget foar effisjinsje en befoarderet de gearhing mei oare programma's.



## **Bibliotheekservice Fryslân - [www.bfrl.nl](http://www.bfrl.nl)**

Bibliotheekservice Fryslân stipet as provinsjale serviceorganisaasje de Frykse biblioteken by it útfieren fan harren wurk troch it dwaan fan fasilitêre tsjinsten, it ûntwikkeljen en oanbieden fan nije produkten en tsjinsten en troch lanlike projekten op provinsjale en lokale skaal oer te setten. De BSF fiert in aktyf belied om it lêzen yn it Frysk te befoarderjen.

Binnen it Tomke-projekt hat de BSF benammen in koördinearjende rol. It finansjele part fan it Tomke-projekt (fersoargjen fan de jierferslaggen, subsidyzjeoanfragen) binne by BSF ûnderbrocht. De Tomke-aktiviteiten foar de biblioteken wurde troch BSF opset en koördinearre. It ferfier fan de ferskate Tomke-boekjes nei de biblioteken wurdt ek troch BSF regele.



### ***De gearwurkjende biblioteken yn Fryslân*** ***FBN – [www.ontdekdebieb.nl](http://www.ontdekdebieb.nl)***

De provinsje telt yn 2012 sân biblioteekklusters;

- 1 Noardeast Fryslân
- 2 NoardWest Fryslân
- 3 Súdwest Fryslân
- 4 Midden-Fryslân
- 5 Súd Fryslân
- 6 Súdeast Fryslân
- 7 Smellingerlân

Fan dizze organisaasjes út wurde de biblioteken (filialen), mediateken en lytse bybs oanstjoerd. Binnen it Tomke-projekt spilet it netwurk van biblioteken in rol by de distribúsje fan de Tomke-materialen, aksjes om Tomke hinne, it jaan fan ynformaasje oer meartalich opfieden oan âlders en fansels it beskikber stellen fan (foar) lêsmateriaal.



### ***CEDIN Taalsintrum Frysk – [www.cedin.nl](http://www.cedin.nl)***

Taalsintrum Frysk is in ûnderdiel van Centrum voor Educatieve Diensten CEDIN. Hja hâlde har benammen dwaande mei meartalich taalbelied en stribje dêrby nei in lykwaardige posysje fan de Fryske taal.

Binnen it Tomke-projekt tinkt CEDIN ûnder oare mei oer edukative aspekten fan it Tomke-barren.



### ***Stichting Partoer CMO Fryslân – [www.partoer.nl](http://www.partoer.nl)***

As sintrum foar Maatschappelijke Ontwikkeling wurket partoer CMO Fryslân gear mei maatskiplike organisaasjes en oerheden oan in leefbere en feilige Fryske maatskippij. Binnen it Tomke-projekt fersoarget Partoer CMO de tariedings en útfiering fan it jierliks Tomke-symposium dat rjochte is op oerdracht fan kennis nei liedster en oare professionals.

**Partoer**  
CMO Fryslân



### **Sintrum Frysktalige Berne-Opfang (SFBO)**

It SFBO is it ynformaasje-, kennis- en stipepunt op it mêd fan meartaligens en taalstimulearring yn de foarskoalske perioade. De provinsje Fryslân stelt SFBO yn de gelegenheid om pjutteboartersplakken en bernedeiferbliuwen te stypje by it ûntwikkeljen fan in Frysk- of twatalich taalbeleid.

It SFBO hat in permaninte fertjtsintwurdiger yn de Tomke-wurkgroep. Har ynbring soarget der mei foar dat de ûnwikkele materialen goed oanslute by it ferlet fan de pedagogyske meiwurkers.



### **Omrop Fryslân – [www.omropfryslan.nl](http://www.omropfryslan.nl)**

De regionale televyzje fersoarget nijs en ynformaasje út en oer Fryslân, makket eftergrûnprogramma's, ûnspanning en muzyk. Foar bern is der alle jûnen in spesjaal programma. Yn gearwurking mei CEDIN fersoarget Omrop Fryslân skoalleútstjoerings foar radio en televyzje. Binnen it Tomke-projekt foarsoarget de Omrop foar it ûntwikkeljen en útsjoeren fan de Tomke-ôfleverings op televyzje.



Omrop Fryslân

### **De Thússoarch organisaasjes**

De thússoarch organisaasjes binne behelle by de soarch foar konsultaasjeburo's, begelieding, kontakten en kursussen. Hja binne der foar mem en bern.

Binnen it Tomke-projekt spylje hja in rol yn it berikken fan jonge âlders troch distribúsje fan it Tomke-boekje.

### **Selskip foar Fryske Tael en Skriftekennisse**

'It Selskip foar Fryske Tael en Skriftekennisse' stipet de Fryske taal en kultuer. Yn gearwurking mei de Tomke-wurkgroep wol it 'Selskip' it lêzen en it foarlêzen in stimulâns jaan. It soarget dat foarlêzers en boartersplakken mei elkoar yn kontakt brocht wurde. Foar de foarlêzers wurde foarlêskursussen organisearre. Alle jierren organisearret It Selskip tidens it FFFestival 'de Fryske Foarlêswike'. De foarlêswike is in gearwurkingsprojekt tusken It Selskip en it Tomke-projekt. It doel fan it projekt is om alle jierren yn dy wike foar te lêzen oan pjuttten op pjutteboartersplakken, bernedeiferbliuwen en biblioteken. De organisaasje fan it foarlêzen leit yn hannen fan It Selskip. De materialen (boekje, poster, pr-materiaal) wurde fersoarge troch it Tomke-projekt.

